



Шочмо эл, порылык да чын верч!

Будь готов /

8-ше (3708) №,
2025 ий 28 февраль,
кугарня



0+

1933 ий 1 февраль годсек лектеш.

Тунемше-влакын
йоратыме урокышт
могай? Палызга.



3-шо лаштык

Шернур район Лажвъял
гыч изи эколог-влак
пүртүс илышым
шымлат.


4-ше лаштык

Опанас, Метрий,
Васлий, Иыван,
Миклай да молат. Нине
лүм-влак могай ойлымашым
умештарат? 8-ше лаштык



Параньга район Кугу Пумарий гыч Ксения Ороспаева ден Максим Кузнецов. Р.НИКОЛАЕВАН фотожо.

QR-код-влак полшымо дене
«Ямде лий» газетым воткыл-
лаште лудын кертыда.



Сылне пайрем Ёярня Шуйна ынде ик арня!

Ёярня – марий калыкын пеш тошто пайремже. Тудо ик арня шуйна. Тиде телым ужатыме да шошым вашлийме пайрем. Тудо телымсе кечын у куатым налын ырыкташ тўналмыш ден кылдалтын. Пайремлыме радам пүртүс помыжалтым, мландын у шўлыш дене шўлалтымышым, айдемын, ешын шошо агам эртарен колташ

вий-куат дене пенгыдеммышым шижтара.

Йоча-шамычат ты пайрем йўлам шымлат. Шинчымашыштым йоча Ёярня пайремыште ончыктат. Тений тудо 1 маргыште Шернур район Кукнур кундемаште, марий Йўштў Кугызан илыме верыштыже, эртаралтеш. Пайрем гыч репортажым вес номерыште лудаш темлена.



Ўшаным Ылжытыше Вашлиймаш

Йоча-влакым возымо пашалан шўмандымаш – кўлешан сомыл. Тидым шотыш налын, йоча газетын пашаенже-шамыч тўрлў школышто вашлиймашым эртарат. Черетан погынымаш Морко район Шордўр тўн школышто гўжлен (снимкыште). Тыгодымак школышто Шочмо элым аралышын кечыжлан пўлеклалтше ече дене танасымаш лийын. Тудо лётчик-испытатель В.В.Егоровым да Мужество орден дене палемдалтше Шордўр школым тунем лекше-влакым шарныме лўмеш эртаралтын.

«Морко мланде» газетын тўн редакторжо А.А.Титов да мый, Екатерина Сергеева, йоча-шамычым журналист паша дене палдаренна, газет номерым ямдылыме нерген каласкаленна. Ече дене танасымашым шарналтен, заметкым возаш тунемынна. Ты вашлиймаште «Ямде лий» дене кылым кучышо ўдыр-рвезе-влакым ужаш куанле лийын. Ўшанена: Шордўр школышто юнкор-шамычын чотышт шукемеш да нуно мемнам возымо пашашт дене ончыкжымат куандараш тўналыт.

*Е.СЕРГЕЕВА.
Авторын фотожо.*

Шочмо элым аралышылан



21 февральште Красногорский поселкышто Шочмо элым аралыше-влаклан пўлеклалтше концерт эртаралтын. Тушто ме, «Изи шўдыр» ансамблын участникше-влак (снимкыште), «Защитники» ден «Шочмо Марий Эл» мурым муренна. Концертым ончаш

шукын погыненыт. Ачам, авам, коваMAT пайремыш ушненыт. Эн ончылно ветеран-влак шинченит. Онгыштышт медаль чолгыжын. Нунын дене кугешнена.

*Света НИКИФОРОВА.
Звенигово, Красногорский.
Фотом еш архив гыч налме.*

Российысе увер

«Подари любовь» сўрет конкурсышко ушныза да шўмчон шижмашдам кагазеш почын пуыза. Конкурсыш 8 ияш гыч ушнаш лиш. Паша-влакым 14 март марте xppen-shop.ru сайтышке колтыза.

11-17 ияш ўдыр-рвезе-влак, географий, биологий, историй, краеведений, этнографий да моло направленийла дене конкурслаште сенгымашда улогын, «Мир открытый» конкурсыш ушныза. 1 июнь марте mk.rgo.ru сайтышке йодмашым колтыза. Сенгыше-влаклан «Артекыш» путўвкым кучыктат.

«Твой взгляд @ Европа-Азия» конкурсыш йодмашым колташ вашкыза. Келшыше номинацийым ойырыза да социал видеороликым ыштыза. Тудо 6 минут деч кужу лийшаш огыл. Тичмаш уверым ogbmagnitka.ru сайтыште ончыза.

Марий Элысе увер

5 мартыште Йошкар-Оласе Калык арвер да сымыктыш тоштерыште этнодизайнер Надежда Акиеван «В лабиринтах орнамента» ончерже почылтеш. Тушто авторын да тудын тунемшыже-шамычын пашаштым ужаш лиш.

Йошкар-Оласе 26-шо номеран гимназийын ўдыр-влак да 9-ше номеран школын рвезе-шамыч командышт «КЭС-БАСКЕТ» школ баскетбол лигын республикысе чемпионатыштыже сенгышыш лектыныт. Нуно Марий Элын чапшым Саранкыште эртаралтше финалыште аралаш тўналыт.

С.Г.Чавайн лўмеш Калыкле книгагудо «Книга дарит вдохновенье» XIII республикысе сўрет конкурсым эртара. Икмыняр произведений негызеш сўретым ямдылыман. Паша-влакым 10 март марте вучат.

Йылме уло – калык ила



Шочмо йылмын тўнямбал кечыжлан пӧлеклалтше «Lingva-территория» йылме-влак фестиваль студент, туныктышо, тунемше, уна-влакым тений латкокимшо гана поген. Тудым Республикысе марий тўвыра рўдер эртарен. Мероприятий радамыште 18 калыкын йылмыже, йўлаже да тўвыраж дене палдареныт.

Теве Звенигово ола гыч «Чувашьен» ансамбль чуваш калык

нерген каласкален. Коллективын кок участникше Варвара Волкова ден Ульяна Краснова (снимкыште) тыгай мероприятий ушнымыштан моткок йывыртеныт. Варвара 1-ше номеран, а Ульяна 3-шо номеран Звенигово оласе школлаште шинчымашым погат.

– *Ме ансамбльыш идалык наре веле коштына. Тушто кушташ, мураш тунемына, тўрлӧ сценкым шындена. Фестивальыште унам вашлийме йўла дене палдаренна. Мероприятий мыланна пеш келшен. Поснак тўрлӧ калыкын куштымашышт. Тыгак шукын ике йылмышт дене мутланеныт, тидыжат оҥайын чучын, – ойлат ўдыр-влак.*

Йылме – калыкын тўня умылымашыжым, тўвыра ойыртежым аралыше поянлык. Тўнямбалне шым тўжем утла йылме уло. Тек кажныже кужу ўмыран лиш. Йылме уло – калык ила.

*О.МОШКИНА-МАЙКОВА.
Авторын фотожо.*

Йӧратыме урок – труд

Ме, 6-шо классыште тунемше-влак, труд урокым кажне арнян вучена. Изарнян кок пыртартыш урокна – йӧратыме труд. Тудым Валентин Николаевич Мартянов кокимшо ий вўда. Урокышто кайык-влаклан кормушкым, шырчык омартам ыште на. Шошым да шыжым пырля тунемме ўдыр-влак дене школ пакчашке лектына. Умылена: пашаште да тунеммаште – вий. Эх, труд урокна кажне кечын лиш гын, могай сай ыле... Ме йӧратыме школышкына кече еда кумылын коштына.

6-шо классыште тунемше рвезе-влак.

*Снимкыште: Роман Гаврилов, Ярослав Михайлов, Павел Васильев.
Фотом школ архив гыч налме.*



Уман ой

Паша – тиде пеш кугу умылымаш. Тудо чыла шотыштат сай лийже: айдемылан шинчымашым пуыжо, пайдам кондыжо.

Михаил ИВАНОВ.

Рўжге ушненна

Йылме – тўнямбалне илыше кажне калыкын поянлыкше, шкешотан улмыжым ончыктышо пале. Шочмо йылме илышым тўзатымаште, чон поянлыкым аралымаште кугу верым налеш. Шочмо йылмын тўнямбал кечыжым школышто рўжге палемденна. Йоча-влак почеламутым рушла да марла сылнын лудыныт, тўрлӧ калык модыш дене модыныт (снимкыште), марла да англичанла мурым муреныт. Книгагудо пашаен А.А.Саматова книга ончерым келыштарен. Кумшо классыште тунемше рвезе-шамыч Макс Майнын «Шочмо йылме» почеламутшым каласкалымышт дене пайремыш погынышо-влакын кумылыштым нӧлтенят.

Дмитрий СМЕРНОВ.

Морко, Кожлаер.

Фотом школ архив гыч налме.



Пашалан туныктат

Эше ожнак ача-ава-влак икшывыштым ончыкылык илышлан ямдыленыт. Тўрлӧ сомылым ышташ туныктеныт. Пашашке 5-6 ияш йочам ушеныт. Вий шутымо сомыл кажне икшывын лийын. Ача пӧрьен сомыллан туныктен гын, ава – ўдырамаш пашалан.

Тиде йўла кызтат аралалт кодын. Мыйымат авам мелнам, когылым кўэшташ туныкта. Эн ончыч умылтара, вара шкеже ыштен ончыкта. Чапле урокым налмек, мый пашалан пижам. Конга гыч пушланыше чевер когылым лукмек, чон куана. Ўярня арня годым тўрлӧ мелнам кўэштынам. «Ямде лий» газетыште савыктыме рецептымат кучылтынам.

Света СОКОЛОВА.

Морко, Коркатова.



Ұчашен мунчалтена

Могай сылне пагыт – теле. Йырым-йыр мотор, чон куана. Тыгай годым мөнгыштө йоршын шинчыме огеш шу. Йолташем дене кажне кечын курыкыш коштына, ватрушко дене ұчашен мунчалтена. Кө мұндыркырак кая – тудо сенгыше. Тыгак еш дене ече дене коштына. Мый телым моткоч йоратем!

*Юлия ГУРЬЯНОВА.
Волжский, Пётъял.*

Телым

Йоратем мый телым
Лумын эркин велмым.
Шуялтем кидемым,
Да ончем мый шулымым.

*Марк ГОРШКОВ.
Волжский, Пётъял.*

Онгай кайык

Мый телым пеш йоратем. Тиде пагытыште издер дене курык гыч мунчалташ, ече дене чодырашке миен толаш лиш. А тидыжым яра жапыште ышташ утларак пайдале. Каныш кечыште йолташ-влак дене шер теммешкак мунчалтена. Тыгак поро пашамат ышташ ом мондо. Пөрт ончылно кормушко кеча, кече еда кайык-шамычым пукшем. Мыланем йошкар онган өрш-влак келшат. Нуно онгай улыт. Ондак ик өрш толеш, кочкеш. Варажым йолташыже-влакым ўжеш. Нуным кечыгут эскераш лиш, нимынар от нойо. Теат шекланыза.

*Тимофей ИВАНОВ.
Морко, Шордүр.*



Изи эколог улыт

Пүртүсым аралыме йодыш эре тургыжландара. Пытаргыш жапыште ты сомыл деке йоча-садлашке коштшо, школлаште тунемше икшыве-влакым утларак кумыландаш тўналыныт. Теве Шернур район Лажъял школышто 4-5-ше класслаште тунемше-шамыч (снимкыште) изинек шымлат. «Точка роста» рўдер пелен «Юный эколог» кружок пашам ышта. Тудым директорын туныктым да воспитаний паша шотышто алмаштышыже Н.Г.Волкова вуйлата.

– *Окружающий мир, биологический урок*лаште йоча-влак келге шинчымашым налыт, но практикылан жап шагларак. Садлан ме тидлан кугурак тўткышым ойырена. Классыште опытым эртарена, экскурсий дене коштына. Кушкылым, пўртүс кончышым шымлаш, айдемын польшыжым але энгекшым ике гыч ужаш туныктена. Тыгак экологий акциялашке ушнена, ончерым чумырена, листовкым, памяткам, знакам пырля ямдылена.

Тўрлө темым авалташ тыршена. Мутлан, кушкыл, янлык-шамычын экологийышт, айдемын йырвелже да молат, – ойла Надежда Геннадьевна.

Йоча-влак, келгын шымлымеке, проектым возат: «Загрязнение окружающей среды и пути решения проблемы», «Экологические привычки», «Живая вода», «Вторая жизнь пластика» да молат. Нине пашала дене тўрлө конкурс ден конференцийыште сенгыше лийыныт.

Туныктым пашашке кугурак класслаште тунемше-влакымат ушат. Тиде «тунемше – тунемше» наставничестве» модуль маналтеш.

– *Кугурак ийготан-влакын шинчымашышт келгырак. Нуно изирак-шамычым туныктен моштышаш, йолташыштын лектышыштан мутым кучышаш улыт*, – ойла кружок вуйлатыше Н.Волкова.

Х.АЛЕКСАНДРОВА.

Фотош школ архив гыч налме.

Сылне пагыт

Вола кава гыч ший лум пырче
Да мландым эркин леведеш.
Мардеж лиш йўдвел гыч –
йўштө,
Садак уремыш чон ўжеш.

Ме чиена вургемым шокшым,
Издерым, ечым налына.
Коеш йырваш, ах,
ошын-ошын,
Ме курык гыч мунчалтена.

*Андрей УШКОВ.
Волжский, Сотнур.*

Юзо виан

Шочмо кундемесе пўртүс идалыкын кеч-могай пагытыштыже сылне, кумылым савырыше. Адакшым моторлыкым умылаш поэт, сўретче-шамыч полшат. Сылне мутышт, тўрлө чияшт дене туге сорастарат, шочмо вердеч лишылже нимат уке, шонет. Теве ялна воктене верланыше Карман курыкымак налаш. Тудо юзо виан. Мотор пўртүс калыкым куандара.

*Илья НИКОЛАЕВ.
Морко, Коркатово.*

Капкылым виангда, уш-акылым пүсемда



Спорт туризмлан негызым эше Пётр I пыштен. Варажым тудо виангын да спортын посна видшылан шотлалташ тўналын. Марий Элыштат тудлан кугу тўткышым ойырат. Спорт туризмын ойыртемеже да пайдаже нерген Кужәнер районьысо «Лүдыкшыдымылык школ» отделенийым вуйлатыше З.Н.Пайдыганова (снимкыште) умылтара.

– Зоя Николаевна, мо тугай спорт туризм?

– Тиде айдемем чыла могырымат виангыше спорт дисциплине. Тыште капкыл вий-куат ден уш-акыл пүсылык иктөр күлешан улыт. Спортсмен-влак ийготыштлан келшыше дистанцийым команде дене але шкет эртат. Тўшкан пашам ыштыме годым ик-

те-весым умылен, полшен мошты-маш тергалтеш.

– Таңасымаш-влак могай лийыт?

– Тиде спорт туризмын видше деч шога. А тудо тўрлө лийын кертеш: йолын коштмо, ече дене, вўд туризм да молат. Таңасымаш пўртгўсыштө, тыгак лўмын кельштарыме зданийыште эртаралтеш. Спорт туризмыште, маршрутын нелылыкшым шотыш налын, куд категорий уло.

– Спорт туризм дене кунам кылым кучаш тўналман?

– Мыняр ондакрак, тунар сайрак.

Школышто йоча-влакым походыш коштыктен, спорт туризм деке шўмандаш лишеш. Икшывылан келша гын, таңасымашлан ямдылаш тўналман. Тиде спорт ончыкылык професийым ойырымо годым моткоч күлешан.

– Иктешлен каласаш гын, тиде спорт могай пайдам конда?

– Пайдаже тўрлө. Мутат уке, тазалыкым виангда, тўрлө ситуацийыште писын шонен мошты-маш пүсештеш. Шке вийлан ўшан пенгыдемеш. Тыгак икте-весе дене кыл виангеш. Походыш коштын, шочмо кундемын онгай верлаж да лўмлө енге нерген шинчымаш пойдаралтеш.

Е.СЕРГЕЕВА мутланен.

Фотом еш архив гыч налме.



Ф И З К У Л Ъ Т - У Р А

Икымше вер

14 февральыште Киров олаште эстетический гимнастике дене «Вятские снежинки» регионьысо турнир эртаралтын. Тушто Татарстан, Чуваший, Марий Эл республикла да Виче кундем гыч спортсмен-шамыч таңасеныт. Медведево спортшколын воспитанницыже-влак икмыняр категорийыште ойыртемаптыныт. Тыге 6-8 ияш спортсмен-влак коклаште «Астелия-Kids» командын гимнасткыже-шамыч (снимкыште) икымше верым налыныт. Тренерышт – Вера Михайловна Орлова.

Е.ГОДУНОВА.

В.ОРЛОВАН фотожо.



Ечым «кычкем»

Мый ече дене кошташ йоратем. Урок деч вара мөнтө толамат, тудым «кычкemat». Чоныштем улшо шўлык лумла шула, мардеж дене ўштылалтеш. Вет спорт – тиде илыш. Арам огыл калыкыште тыге ойлат: «Таза капыште – таза чон». Йоча-влак, спорт дене пенгыде кылым кучыза.

Юлия ЯГОДАРОВА.

Советский, Кельмаксола.



Лектыш куандарыше

Шочмо элым аралышын идалыкшылан пөлеклалтше ече дене таңасымаш Татарстан Республик Агрыз район Буймо школышто эртаралтын. Тудо «80 шагов к Победе» проект радамыште лийын. Таңасымашке Буймо, Пелемеш, Көлегеш школла гыч тунемше-влак ушненыт. Мемнан классыште шинчымашым погышо-шамычат

ече ўмбаке рўж шогалыныт (снимкыште). Аня Исаева, Тая Михеева, Ульяна Булдакова 1-4-ше класслаште тунемше-влак коклаште сенгыше радамыш лектыныт. Телым физкультур урокышто эре ече дене коштына. Теве лектышна – шинча ончылно.

М.МИХАЙЛОВА.

Фотом школ архив гыч налме.



• Кроссворд •

Вашмут-влакым чын муыда гын, марий йомакысе мотор ұдырын лўмжым пален налыда.

1. Сур, осал янлык.
2. Марий патыр.
3. «... тум-тум, ик игет кудалте тум-тум».
4. Гав лўман пырысыгын йолташыже.
5. «Теремок» йомакысе ужар герой.
6. Мо шўртньў муным пудыртен?
7. Кў ревым шынден?
8. Йомакысе осал кува.

	2	3		5	6	7	8
1			4				

Кок йолташ

Илен улмаш Өрш. Кажне телылан почмо кундемшыкыже пўртылын. Ик сурт воктене кайыкклан кочмывер улмым сайын пален. Икана, кожлам ончен савырнымыж годым, Кисам вашлийын.

– Өрш йолташ, кожлаштына кочкыш кодын огыл. Мом ышташ тўналына? Йўштў телым кузе илен лектына? – азапланен Киса.

– Нимолан ойгыраш. Пўртўслан, янлык ден кайыкклан полишышо-шамыч кундемшытына шукын улыт. Чофеште почешем, кочмыверым ончыктем, – куандарен Өрш.


Кок йолташ шер теммеш кочкын. Йолташышт-влакым ўжыныт. Кочкыш чылалан ситен. Вара суртозан сылне мурым пўлекленыт. Шошым сад-пакчам шукш-копшанге деч эмлаш товатленыт.

Амелия КОШТАЕВА.
Шернур, Кукнур.

Кече ден Тылзе

Кече ден Тылзе келшен, икте-весьым пагален иленыт улмаш. Кече шокшыж дене айдемым, кушкылым, янлыкым, кайыкым да молымат куандарен. Чыланат тудым моктеныт, таум ойленыт. Шокшыжым утларак колтымыж годым шылталеныт. Тунамже Кече утларак чеверген, эше чотрак ырыктен. Чыла чонан Кече шичмым, кас рўмбалгым вучен. Тунам каваште Тылзе озаланен. Волгыдо-волгыдо, кугу понар гай.

– Уф, шўлалтена ынде. Тылзе волгыдат мыланна сита, – ойленыт чодырасе янлык ден кайык-влак. Ты ойым Тылзе колын. Тылеч вара шкенжым эн виянлан шотлаш тўналын.



– Эй, Кече, ужат, чонан-шамыч тыйым вурсат! Шокиет деч ярнен пытеныт! Мом эре каваште шыргыжат! Чарне, пыл коклашке шыл! Шойышто чуриетым! Мый йўдшў-кечыже нуным куандарен кертам! – кугешнен ойлен Тылзе.

Кече тыгай савыртышлан ۆрын. Тылзе дене туманлаш тўналын. Ик кече ўчашат, кокымшо, кумшо... А тыгодым кавам шем пыл авалтен. Чарныде, ложгыктен кугу йўр йўрын. Ны Кечым, ны Тылзым иктат ужын огыл. Мландын чытышыже пытен. Нуным лыпландараш кўлым умылен.



– Ида каргаше, ида вурседыл! Кече, тый чылалан моткоч кўлат. Тылзе, тыйат пайдале сомылетым шуктет. Пўртўсыштў нимо уто уке. Чылажат да кажныжат – шке верыштыже. Икте-весьыдам ужмыда ок шу гын, мый тыге темлем: кечывалым Кече пашам ышта, йўдым тудым Тылзе алмашта, – мудреч ойжым Мланде темлен.

Кече ден Тылзе келшат. Тачат, икте-весьым алмаштылын, каваште озаланат.

Александра ВАСИЛЬЕВА.
Морко, Коркатово.

Элина ЯМБАРШЕВАН сўретше-влак.

Йолагай ден Пулагай

Марий калык йомак



Йолагай ден Пулагай сад-пакчашке олма кочкаш миеныт. Олмапушко кўзаш ۆрканенытат, йымаланже комдык возын, умшашке волен вочмым вучен кият.

Изиш лиймеке, Пулагайын нерышкел олма калт шоктен камвозеш.

– Ой-ой, умшашкем те-ве-теве пурен кая! – Пулагай манеш.

Йолагайже ойла:
– Э-эй, лийын шудымым ойлыштит! Мый пелешташат ۆрканем ыле.

• Кум сўрет почеш руш йомакым палыза. •



Максим КАЧУЕВ ден Андрей УШКОВЫН сўреттышт.
Волжский, Сотнур.



Серыш гоч келшымаш

Коркатово лицейсе орлёнок-шамычын мўндыр Ямал-Ненец автоном округысо Панаевский школышто тунемше-влаклан серышым возымышт нерген увертаренна ыле. Йо-ча-шамыч икте-весе дене келшаш тўналме нерген ой дене лектыныт ыле. Вучымо вашмут

толын. Панаевский школын орлёнокшо-влак У ий дене саламленит, пёлекымат пыштеныт. Нухуко лўман ненец курчак, ош маска, серыш-влак келшымашым пенгыдемдыше пёлек улыт (снимкыште).

В.СМИРНОВ ямдылен.

Фотом лицейын архивше гыч налме.

Историйым шергалына



1799 ий 3 мартыште вице-адмирал Фёдор Фёдорович Ушаковын вуйлатыме руш эскадр Корфу орым француз-шамыч деч утарен.

Электротурлым аныктыза

Пайдале ой-кагаш

- Пёлемысе лампычкым жапын-жапын ўштса.
- Холодильникыште погынышо ийым левыктыза.
- Чайникысе шокшо вўдым термосыш ястарыза. Тыге ыштеда гын, вўдым эре шолтыммо ок кўл.
- Чот кукшо але вўдыжгё вургемым шымартыме годым электроэнергий шукурак кучылталтеш.
- Пёлемыште диваным, ўстелым батарей воктеке ида веранде.
- Йўдлан окна занавескым петырыза.



Ўярня

Мутшо ден семже О.Герасимовын

Кече саяк ырыкта –
Лум йымачын вўд йога.
Колышт-ян, «йор-йор» шокта.

Коваем мелнам ышта –
Тамлын пеш «чыз-чыз» шокта.
Куанен, мемнам пукша.

Лум курыкыш каена,
Курык гыч мунчалтена –
Капна «лот-лот» вел шокта!

Ожнысекак калыкем
«Йор-йор» мурыжым мурен,
Ўярняжым эртарен...

Ўярня «йор-йор»!

Вашкыде. Пелеитенрак.



Ке - че са - як ы - рык - та - лум йы - ма - чын вўд йо - га.
Ко - ва - ем мел - нам ыш - та - там - лын пеш "чыз - чыз" шок - та,
Лум ку - ры - кыш ка - е - на, ку - рык гыч мун - чал - те - на -



Ко - лышт - ян: "Йор - йор" шок - та.
ку - а - пеш, мем - нам пук - ша.
кап - на "Лот - лот" вел шок - та!



Ож - ны - сс - как ка - лы - кем "Йор-йор" му - ры - жым му - рен,



Ў - яр - ня - жым эр - та - рен...



Ў - яр - ня "Йор - йор"!



0+

Марий Эл Республикасысе «Марий Эл» увер агентстве» КАУ.
Директор – Е.И.КУЗНЕЦОВ.
Тўн редактор – А.Н.ГРИГОРЬЕВА.

Индекс П4696.
Тираж 1550 экз.
Заказ
Формат – А-4-8.

Учредитель-влак:
Марий Эл Республикасысе Тўвыра, печатъ да калык-влакын пашашт шотышто министерстве, Марий Эл Республикасысе «Марий Эл» увер агентстве» КАУ.

Редакций да издатель: Марий Эл Республикасысе «Марий Эл» увер агентстве» КАУ, 424006, Йошкар-Ола, СССР Вооружённый Вийын 70-ше идалькыше урем, 20-шо порт. Тел. 8(8362) 45-22-82.

Газетым редакцийыште погымо да версталыме, «Марий Эл Республикасысе Правительствын типографийже» ООО-што ямде оригинал-макет гыч савыктыме. Типографийын адресше: 424000, Йошкар-Ола, Комсомольский урем, 112.

Печатыш пумы жап – 14-00, фактически – 13-00.

Авторын да редакцийын шонымашышт тўрлў лийын кертит. Серыш-влак мўнггеш огыт колталт. Ак – кутырен келшыме почеш.

https://vk.com/yamde_lii
<https://t.me/yamdelii>
yamde_lii@mail.ru
yamdelii@mediamari.ru (автор-влаклан)
Сайтын адресше: ямделий.рф

Газетым Кыл, информационный технологий да массовый коммуникаций сферым эскерыме шотышто федеральный службын Юл кундем федеральный округысо управленийыште регистрироватлыме. Номер – ПИ № ТУ52-01404, 2023 ий 22 сентябрьыште пумы.

